

Da la ovra electrica enfin tar la chatscha speziala

La regenza ha respundì a 14 dumondas inoltradas da deputadas e deputads

■ (ac) Las offertas da las interpresas grischunas n'èn betg vegnidas resguardadas tar la surdada da la lavur da construcziun da la nova ovra electrica al cunfin da l'Engiadina Bassa cun l'Austria. Tenor las explicaziuns da la cussegliera guvernativa Barbara Janom Steiner nun eran las offertas svizas ablas da concurrer.

Actualmain vegn construida ina gronda ovra electrica al cunfin da la Engiadina Bassa e l'Austria per 460 milliuns euros. La gronda part da la construcziun sa chatta sin intschess austriac, las Ouvres Electricas d'Engiadina (OEE) èn participadas cun 14 procent al project. La fatschenta vegn dirigida dalla ovra partenaria da l'Austria participada cun 86 procent. Las emprimas lavurs da construcziun èn surdadas, dentant naginas ad interpresas indigenas. Quai fatg ha intimà il deputà *Andreas Felix* (pbd Tschintg Vitgs) a la dumonda co la regenza grischuna valeteschia quel fatg. La cussegliera guvernativa *Barbara Janom Steiner* ha concedì ch'inginas interpresas svizas hajan inoltrà offertas. Quellas offertas na sajan dentant betg stadas ablas da concurrer ed uschia betg vegnidas resguardadas. La cussegliera guvernativa ha visà a las reglas internaziunalas da surdar lavur che na lubeschian nagina intervenziun. Cunquai che l'interpresa partenaria da l'Austria possedia la gronda cumpart al project saja era quella interpresa responsabla per surdar las lavurs. Barbara Janom Steiner quinta dentant che las interpresas re-



La construcziun da la ovra electrica sin intschess da l'Engiadina Bassa e dal Tiroi ha cumenzà e l'ovra è stada tematisada en l'ura da dumondas dal cussegl grond. FOTO OEE

sguardadas vegnian a dar vinavant lavur a sutinterpresas uschia ch'era interpresas indigenas possian probablmain profiter.

Schanzas vesa la cussegliera guvernativa era per interpresas indigenas da recaltgar lavur en la sparta tecnica. Quellas lavurs

na sajan anc betg surdadas, ha fatg a savair Barbara Janom Steiner.

Chatscha supplementara en asils da selvaschina

Tema durant la ura da dumondas dal cussegl grond è tranter auter stada la chatscha supplementara. Il deputà *Christian Mathis* (pps Küblis) ha vulì savair tgi che haja lubì la chatscha speziala en divers asils da selvaschina, asils federali sco chantunals. En absenza dal cusseglier guvernativ, *Mario Cavigelli*, ha Barbara Janom Steiner pri posiziun. Ella ha visà a las prescripziuns federalas da chatscha che lubeschian da regular il dumber da selvaschina en la part parziala da l'asil federal. En la part integrala dals asils federali saja la chatscha cumplainamain scumandada. Responsabla per las prescripziuns da chatscha en il Grischun saja la regenza grischuna. Las prescripziuns chantunals lubeschian era chatscha supplementara en ils asils chantunals. L'organisaziun da la chatscha supplementara giascha tar l'Uffizi chantunal da chatscha, ha la cussegliera guvernativa fatg a savair. En ils tschintg asils menziunads en la dumonda dal deputà *Christian Mathis* en vegnids sajatads 27 tschiervs durant la chatscha speziala dal november passà. Il deputà *Andy Kollegger* (pbd Cuirra) ha vulì savair da la regenza il motiv che la Scola auta tecnica (HTW) da Cuirra haja visà la commembranza cun la cuminanza da las scolas autas da la Svizra

orientala. E vinavant sche quella decisiun saja crudada en enconuschientscha da la regenza grischuna. Respundì a la dumonda ha il cusseglier guvernativ *Martin Jäger*. El ha rendì attent che la HTW reschia da perder sia acreditaziun en la furma organisatorica actuala. In ulteriur motiv da visar la convegna cun la cuminanza da las scolas autas da la Svizra orientala saja la finamira dal chantun Son Gagl da centralisar las scolas. Divers chantuns fetschian resistenza a quellas stentas. *Martin Jäger* ha menziunà il parairi dad ina gruppa dad experts che saja vegnida a la conclusiun che la HTW posia era retschaiver ina acreditaziun sco scola auta ordaifer la cuminanza da las scolas autas da la Svizra orientala. Ulteriuras dumondas han tematisà la fiera d'electricità cun la Uniun europeica, la planisaziun tal territori sco la malsogna Ebola e las preparativas dal chantun en connex cun ina eventuala infecziun. Il deputà *Christian Kasper* (pld Luzein) ha vulì savair da la regenza cifras concretas davart la plivalur creada da la preschientscha militara en il chantun Grischun. Il cusseglier guvernativ *Christian Rathgeb* ha inditgà 25 francs per schuldà e di che restian en il chantun. Las perspectivs areguard la plivalur futura da l'armada svizra nun èn dentant fitg empermettentas. Approva il parlament federal la proxima referma da l'armada vegn il dumber da schuldads smesà ed ils curs da repetiziun sminuidi da trais sin duas emnas.